

জাতীয় চলচ্চিত্র পুরস্কারে নারী নির্মাতারা

নন্দিতা আহমেদ

বিশ্বে যা কিছু চির কল্যাণকর, অর্ধেক তার আনিয়াছে নারী অর্ধেক তার নর, জাতীয় কবি কাজী নজরুল ইসলামের কবিতার লাইন। পৃথিবীর যা কিছু সুন্দর, সফল সবখানেই পুরুষের পাশাপাশি নারীর অবদান রয়েছে। তেমনিভাবে এদেশের চলচ্চিত্র চর্চা কিংবা বিকাশের যে ইতিহাস সেখানেও নারীরা রয়েছেন দারুণভাবে সম্মুখভাগে। তবে সিনেমা নির্মাণের ক্ষেত্রে এদেশে নারীর মেধার বিকাশ তাল মেলাতে পারেনি পুরুষের সঙ্গে। সামাজিক প্রেক্ষাপট, নারীর উদ্যোগের অভাবই হয়তো এর কারণ। সঙ্গত কারণেই জাতীয় চলচ্চিত্র পুরস্কার জয়েও নারী নির্মাতাদের সাফল্য হাতে গোনা।

বাংলাদেশে চলচ্চিত্রের রাষ্ট্রীয় ও সর্বোচ্চ পুরস্কার জাতীয় চলচ্চিত্র পুরস্কার। ১৯৭৫ সাল থেকে এ পুরস্কার প্রদান করা হচ্ছে। বাংলাদেশ সরকার চলচ্চিত্রশিল্পের বিকাশ ও উন্নয়নে উল্লেখযোগ্য অবদানের জন্য ব্যক্তিবিশেষ এবং শ্রেষ্ঠ চলচ্চিত্র ও প্রামাণ্যচিত্রকে জাতীয় চলচ্চিত্র পুরস্কার প্রদান করে। ১৯৮১ সালে কোনো পুরস্কার দেওয়া হয়নি। কারণ জুরি বোর্ড কোনো চলচ্চিত্রকে পুরস্কার পাওয়ার যোগ্য মনে করেনি। সর্বশেষ ২০২২ সালের পুরস্কারজয়ীদের তালিকা প্রকাশ হয়েছে। এটি হচ্ছে ৪৭তম।

১৯৭৫ থেকে ২০২৩, এই ৪৮ বছরের পুরস্কার পরিক্রমায় নারী নির্মাতাদের সাফল্য একেবারেই হতাশাজনক। অবশ্য এ দেশের চলচ্চিত্রে নারী নির্মাতার সংখ্যাও হাতে গোনা। সেই ১৯৭০ সালে রেবেকা প্রথম নারী নির্মাতা হিসেবে নাম লেখান। তিনি পরিচালনা করেছিলেন ‘বিন্দু থেকে বৃত্ত’ নামে চলচ্চিত্র। এটি মুক্তির পর বেশ প্রশংসিত হয়। চলচ্চিত্র নির্মাণে নারীর পা রাখা সেই প্রথম। এরপর অনেকেই চেষ্টা করেছেন। প্রশংসার সঙ্গে জিতছেন স্বীকৃতি ও পুরস্কার।

তবে জাতীয় চলচ্চিত্র পুরস্কার জয়ের তালিকায় আছেন কেবল দুজন। তারা হলেন কোহিনুর আক্তার সূচন্দা ও সৈয়দা রুবাইয়াত হোসেন। ৪৭ বছরের ইতিহাসে এ দুই নারী নির্মাতাই রাষ্ট্রীয় স্বীকৃতি পেয়েছেন।

সৈয়দা রুবাইয়াত হোসেন ২০২২ সালের সেরা নির্মাতা হিসেবে পুরস্কার জিতলেন ‘শিমু’ সিনেমার জন্য। ছবিটিতে অভিনয় করে সেরা অভিনেত্রী হিসেবে পুরস্কার জিতেছেন রিকিতা নন্দিনী শিমু। এ ছাড়া শ্রেষ্ঠ সম্পাদক হিসেবে সাজন মাহমুদ ও শ্রেষ্ঠ পোশাক ও সাজসজ্জায় তানসিনা শাওন জাতীয় চলচ্চিত্র পুরস্কার পেয়েছেন।

অনুভূতি প্রকাশ করে তিনি বলেন, ‘এটা সত্যিই আনন্দের যে আমাদের সিনেমাটি রাষ্ট্রীয়



স্বীকৃতিতে বেশ কয়েকটি শাখায় নাম লিখিয়েছে। আমি শিমু, সাজন মাহমুদ ও তানসিনা শাওনকে অভিনন্দন জানাই। এ প্রাপ্তি আমাদের কাজের প্রেরণা দেবে।’

২০১০ সালে রুবাইয়াত হোসেন নির্মাণ করেন ‘মেহেরজন’। ছবিটি দেশে আলোচনা-সমালোচনার পাশাপাশি বিদেশে পুরস্কৃতও হয়। এরপর তিনি ‘আন্ডার কনস্ট্রাকশন’ নামে একটি ছবি নির্মাণ করেন। তার পরিচালিত সর্বশেষ চলচ্চিত্র শিমু ২০২২ সালের মার্চে মুক্তি পায়। এর আগে ২০১৯ সালের ডিসেম্বরে ফ্রান্স, ডেনমার্ক, কানাডা ও পর্তুগালের বিভিন্ন সিনেমা হলে বাণিজ্যিকভাবে ‘মেইড ইন বাংলাদেশ’ নামে মুক্তি পায় ছবিটি। এরপর ২০২০ সালে যুক্তরাষ্ট্রের বিভিন্ন হলে প্রদর্শনের পর ছবিটি বাণিজ্যিকভাবে দেখানো হয় মেক্সিকো, চীন, সিঙ্গাপুর, অস্ট্রেলিয়া, তুরস্ক, জাপান ও জার্মানির সিনেমা হলে।

বাংলাদেশে নারীর ক্ষমতায়নে ও আত্মনির্ভরশীলতা অর্জনে পোশাকশিল্পের যে ভূমিকা আছে তার আলোকে দৃঢ়চেতা নারী পোশাকশ্রমিকদের সংগ্রাম ও সাফল্যের গল্প বলা হয়েছে এ চলচ্চিত্রে। শিমু প্রতিকূলতা জয় করে সামনে এগিয়ে চলা প্রতিটি সংগ্রামী মানুষের গল্প। সমতার প্রশ্নে এ সিনেমার প্রধান চরিত্রে শিমু একজন সম্মুখযোদ্ধা। রুবাইয়াত হোসেনের পাশাপাশি ছবিটির মূল কুশলীর অধিকাংশই ছিলেন নারী। চিত্রগ্রহণে সাবিন ল্যাঞ্জেবলিন, শব্দগ্রহণে এলিশা আলবার্ট এবং শিল্পনির্দেশনায় ছিলেন জোনাকি ভট্টাচার্য।

চলচ্চিত্রটির বিভিন্ন চরিত্রে অভিনয় করেছেন রিকিতা নন্দিনী শিমু, নভেরা রহমান, দীপান্বিতা মার্টিন, পারভীন পারু, মায়াবী মায়্যা, মোস্তফা মনোয়ার, শতান্দী ওয়াদুদ, জয়রাজ, মোমেনা চৌধুরী, ওয়াহিদা মল্লিক জলি, ওসামিনা লুৎফা প্রমুখ। দুটি অতিথি চরিত্রে অভিনয় করেছেন মিতা চৌধুরী ও ভারতের শাহানা গোস্বামী।

বাংলাদেশের খনা টকিজ ও ফ্রান্সের লা ফিল্মস দি এপ্রেস-মিডির ব্যানারে নির্মিত শিমুর প্রযোজক ফ্রাঁসোয়া দভেমা ও আশিক মোস্তফা এবং সহ-প্রযোজক পিটার হিলডাল, পেত্রো বোর্হেস, আদনান ইমতিয়াজ আহমেদ ও রুবাইয়াত হোসেন। পরিবেশনা ও আন্তর্জাতিক বিক্রয় প্রতিনিধি ছিল ফ্রান্সের পিরামিড ফিল্মস।

আর ২০০৫ সালে মুক্তি পাওয়া ‘হাজার বছর ধরে’ সিনেমা দিয়ে প্রথম নারী নির্মাতা হিসেবে জাতীয় চলচ্চিত্র পুরস্কার জয় করেন কোহিনুর আক্তার সূচন্দা। ঢাকাই সিনেমার কিংবদন্তি অভিনেত্রীর এটা ছিল দ্বিতীয় চলচ্চিত্র নির্মাণ এবং এটাই শেষ। তার স্বামী প্রয়াত চলচ্চিত্রকার ও কথাসাহিত্যিক জহির রায়হানের উপন্যাস ‘হাজার বছর ধরে’ অবলম্বনে সিনেমাটি নির্মাণ করেন তিনি। এটি মুক্তির পর বেশ সাড়া ফেলে। শ্রেষ্ঠ পরিচালক, শ্রেষ্ঠ ছবি, শ্রেষ্ঠ কাহিনিকার, শ্রেষ্ঠ চিত্রগ্রাহক, শ্রেষ্ঠ সংগীত পরিচালক ও শ্রেষ্ঠ শিল্পনির্দেশক; এ ছয় শাখায় জাতীয় চলচ্চিত্র পুরস্কার জিতে নেয়।

জাতীয় চলচ্চিত্র পুরস্কারে নারী নির্মাতাদের মধ্যে সাফল্য পেয়েছেন নার্গিস আক্তার ও শাহনেওয়াজ কাকলীও। তবে তারা স্বীকৃতি পেয়েছেন শ্রেষ্ঠ কাহিনীকার ও চিত্রনাট্যকার হিসেবে। নার্গিস আক্তার প্রথম স্বীকৃতিটি পান ২০০১ সালে ‘মেঘলা আকাশ’ সিনেমা দিয়ে শ্রেষ্ঠ চিত্রনাট্যকার হিসেবে। ২০১০ সালে তিনি একই শাখায় পুরস্কার জিতে নেন ‘অবুবা বউ’ সিনেমা দিয়ে। শাহনেওয়াজ কাকলী শ্রেষ্ঠ কাহিনিকার হিসেবে ২০১২ সালে ‘উত্তরের সুর’ সিনেমার জন্য জাতীয় চলচ্চিত্র পুরস্কার পান। শ্রেষ্ঠ সংলাপ রচয়িতা বিভাগে রুবাইয়াত হোসেন ২০১৬ সালে ‘আন্ডার কনস্ট্রাকশন’ সিনেমার জন্য পুরস্কার জিতেছেন।

চয়নিকা চৌধুরী, সামিয়া জামান নির্মিত সিনেমা নানা বিভাগে জাতীয় চলচ্চিত্র পুরস্কার জিতলেও তারা কোনো স্বীকৃতি পাননি। মেহের আফরোজ শাওন নির্মিত ‘কৃষ্ণপক্ষ’ সিনেমায় পুরস্কার জিতেছিলেন শ্রেষ্ঠ নারী কণ্ঠশিল্পী বিভাগে।